

摘藻堂四庫全書薈要

集部

欽定四庫全書薈要

聖祖仁皇帝御製文第三集卷十九目錄

論

宋高宗父母之讐終身不雪論

三角形推算法論

量天尺論



欽定四庫全書薈要卷一萬三千一百三

集部

聖祖仁皇帝御製文第三集卷十九

論

宋高宗父母之讐終身不雪論

朕萬幾餘暇命大學士翰林該直者於南書房出宋高宗父母之讐終身不雪論朕亦作焉大學士熊賜履將朕意已書因文意得體故不復作衆官作完進呈朕一細閱責之太過者不免刻薄立已之意者不能無私

文章雖雅皆非至當不易之理朕自弱齡苦好讀書未嘗以文為事況帝王之學識其遠者大者而已非儒生對句華辭多麗為勝也覽此衆論又不能無疑故勉強濡毫出意見再論之論古人之道猶後之視今須在中正和平中正則不偏和平則不闕責人重者責已輕千百年前所為以瞬息論之易一生數十年間事業成之難自古創業守成自有其法創業惟艱守成不易宋之開創已百餘年矣徽宗守成之主不能敬天法祖有圖

燕之議亡失故有三也所以天命將危外患已深雖孝子慈孫不能改也當日能保邦於未危治之於未亂任賢勿二去邪勿疑內有守國之賢相外有謀勇之將士可以一鼓而殲遼金何難之有若至危急存亡之秋武侯之才止於死而後已之歎僅存漢室三分偏安蜀都矣又覽史冊韓世忠敗金兵於金山烏珠乘騎而遁金山者共目所覩豈能乘騎排兵耶南渡史訛以至如此况金兵破遼之後兵已滿萬人強將猛非宋之所敵明

矣備責不能臥薪嘗膽以雪父兄母后之讐則高宗何辭若論李綱之忠言不聽岳飛之丹誠不用設使諫行言聽則必勝金兵於朱仙生還二帝於汴京朕實不信也何也根本已久不固人心已久不一上無慣戰之良將下無用命之士卒天下雖有勤王之名真偽莫測虛實難分高宗久在金營孰強孰弱自有切見若使復讐雪耻再整江山實不能也勢使之也孟子曰寡衆弱強不敵也若論講和之非我

太祖高皇帝因祖之讐戊午起兵戰必勝克必取所向  
無敵有往必成神威聖武深仁厚澤猶念中國塗炭數  
次議和明朝引南宋講和之非始終不悟歸罪兵部尚  
書陳新甲為秦檜棄市示衆發天下兵迎戰如袁崇煥  
毛文龍洪承疇祖大壽唐通吳三桂前後千餘員凡出  
關者非死即降靡有孑遺財賦因之已竭人心隨而思  
亂百萬雄兵盡沒東海億兆窮民罹於邊戍元氣盡傷  
於關東闖賊蜂起於隴西賊至京城文武逃散無一死



於難者豈非當日不主議和者乎偏安社稷猶存一線之脉絡若為雪耻復讐同死於國難者尤不知於明末同乎否乎文天祥云社稷為重君為輕立君以存社稷存一日則盡臣子一日之責實千載忠臣之語君與社稷并而為一也使高宗匹夫之勇死而無悔不顧社稷以死雪讐又不知當時議論如何耶天下非一人之天下有德者可以居之民不堪命即有是日昌喪之詩天視天聽自我民始有國家者不可以不慎朕不敢責於

已然而責於未然取其殷鑒不遠之誠自警自成云爾  
不暇多論古人是非也

三角形推算法論

孟子曰規矩方員之至聖人人倫之至益見規矩方員  
乃數學之根本太極兩儀之變化也三代以上人心尚  
實有學必精所以考定日月之盈縮七政之參差鳥獸  
草木之應候又以閏月定四時庶績成熙者豈偶然哉  
古人璿璣齊七政表度準南北察兩至明太陽之回轉

識二分爲寒暑之變遷日月星辰交食凌犯入差清濛  
地氣之考苟非測量難得其詳有測量而無推算勢不  
可成所以古人以圓容衆角衆角容方自方而三角勾  
股在其中矣勾三股四弦五者以直角而論乃一角九  
十度竝兩角又九十度即成半圓一百八十度也若非  
直角出入九十度內外者勾股之所不能推雖分作直  
形湊合偶成亦非數家之堂奧何足論哉上古若無衆  
角歸圓何能得厯之根而成八線之表皆因俗就易畏

頗以功名仕宦為重敬天授時為輕故置而不論以至  
如此康熙初年間以厯法爭訟互為訐告至於死者不  
知其幾康熙七年閏月頒厯之後欽天監再題欲加十  
二月又閏因而衆論紛紛人心不服皆謂從古有厯以  
來未聞歲中再閏因而諸王九卿等再三考察舉朝  
無有知厯者朕目覩其事心中痛恨凡萬幾餘暇即專  
志於天文厯法二十餘年所以略知其大概不至於混  
亂也論者以古法今法之不同深不知厯厯原出自中

國傳及於極西西人守之不失測量不已歲歲增修所以得其差分之疎密非有他術也其名色條目雖有不  
同實無關於厯原皆係於歲修察考之密方圓衆角之  
推算測量經緯之分合則厯法行之十年何弊之有三  
角者圜方衆角之盡精微易曉舍此而他求必至混雜  
厯不可成矣唐一行元郭守敬不過借回回厯少加潤  
色偶合一時而已亦不能行久可見出於意見非有根  
基於算術也厯本於測量終於推算授之於民時驗之

於交食豈能逃於衆目之所觀乎

量天尺論

或曰古有量天尺然天可量乎對曰此數學之不解天文之不明自古未定之學况萬幾不暇惟日孜孜宵衣旰食用心治理不當論及奈自弱齡讀書凡有學問必細心考索務求真實少得厯根三角勾股之精微故不辭無文而援筆論之夫天者高明在上萬物覆焉易云天尊地卑乾坤定矣書云天高聽卑至理明矣言其德

也天無私覆無為而成者天之道也蒼蒼在上不可階而升者理也何能量之乎聖人作而有太極陰陽河圖洛書出焉所以仰觀俯察用一二五七九之奇數二四六八十之偶數驗之於推測考之於鳥獸草木而後定厯元分閏餘察黃鐘之律而萬事之本得矣齊政授時黎民於變時雍者聖人之德也後世不察究天文厯元之所由來只求於末節圖捷易為所以日離月遠而不悟兼之文章聰明各出已見後世數學茫然不傳矣豈

不惜乎厯元之測天者最關於度數分秒天之三百六十度地亦三百六十度地之一度以周尺測驗得二百五十里而無餘以今尺測驗得二百里無餘知其天度地度同也以之而測太陽之某日某地高度即得北極之高度按法算之不在表之大小地方之遠近絲忽不爽擴而充之七政凌犯交食雖千萬年或前或後可坐而待也豈不信乎前儒嘗論總因理深者大過而不明數學數學者不及而未必得理各塗各作不能合而為



一後人以文章之雌雄為斷亦不勞心靜思求聖人敬授人時之本也朕嘗試之至二十里不測太陽之高度種種差分之數少有疎忽其表影即不準矣又考古人先定影數不究表之長短只定冬至一影而紛紛立議所以不明者甚矣此至理之所在非難事也儻見理不確以聰明尋去再無頭緒不得表影之準則矣依此論及天不可量地可量也古人精於測器凡有歲差月差日差時差蒙氣差之類皆自測量而得非有他伎也朕

偶有測量無不細究帝王之家物無不有往往以測器  
中留心又如此設使改厯元作八線皆可以目前試得  
總而論者測日影長短則有所據若量天則非吾之所  
能也

聖祖仁皇帝御製文第三集卷十九

欽定四庫全書薈要

聖祖仁皇帝御製文第三集卷二十目錄

序

親征平定朔漠方略序

增修皇輿表序

五燈全書序

清文鑑序

全唐詩錄序

全唐詩序

欽定四庫全書薈要卷一萬三千一百四

集部

聖祖仁皇帝御製文第三集卷二十

序

親征平定朔漠方略序

朕祇承

天眷懋紹

祖宗丕基為億兆生民主薄海內外皆吾赤子雖越在邊徼荒服之地儻有一隅之弗寧一夫之不獲不忍忽

然視也西北塞外喀爾喀七旗與厄魯特四部落並號  
雄藩同奉職貢非一日矣不意有厄魯特噶爾丹者賦  
性凶殘中懷狡詐戕害其兄弟兼并四部蠶食鄰封其  
勢日張其志益侈朕初聞厄魯特與喀爾喀交惡隨遣  
親近大臣頒恩賚以和解之迨其後興兵構怨又命大  
臣曉譬利害諭令息爭乃噶爾丹抗旨狂逞致喀爾喀  
為所潰敗叩關乞援朕收撫之置諸邊內資給餼牽始  
皆得所而噶爾丹猶修葺如故所在侵陵忽闌入我烏

闌布通之地朕授鉞親王大臣問罪聲討大師克捷未  
即殄除時賊倉皇遁深懼我軍之窮追投牒指誓因  
而釋之假使噶爾丹能自此悔禍改圖則雖至今存可  
也夫何轉瞬渝盟包藏不軌窺伺我斥堠搖惑我外藩  
潛敎我納木扎爾拖音肆虐不止朕深念此寇斷宜速  
滅於是整飭士馬備峙糧糗決策親征而賊之蹤跡飄  
忽無常又慮其兵至遠賜兵退復入乃授密畫於科爾  
沁王沙津令其遣使誘賊約至近地旋調發盛京諸路



軍禦東路分遣一軍截西路朕躬統六師從中路入比  
行近賊巢噶爾丹不敢抗我顏行聞風奔竄朕遂親率  
前鋒軍併日追擊賊窮蹙已極盡棄其子女輜重而遁  
會與我西路師遇大敗其軍噶爾丹僅以數人跳身走  
嗣是朕再駕而至鄂爾多斯三駕而至狼居胥山麓宣  
威布惠兼用互施招徠其黨羽過絕其歸路其寨桑等  
接踵嚮附其子復為我擒賊自料勢不能追遂爾仰藥  
授首所親信丹濟喇等亦相繼乞降二十餘年狡悍陸

梁之勁寇曾不二載悉皆草薶禽獮而大業克就矣夫  
烈燄弗戢必將燎原積寇一日不除則疆圉一日不靖  
方親征之初舉也在廷諸臣多持異議狃於目前之計  
者謂兇鋒挫衄無足深憂憚於征繕之煩者謂大漠遊  
魂難以就縛不知除惡務盡制勝在謀歷觀漢唐宋之  
已事往往罷敵中國之力而不能成廓清邊塞之功良  
由經理失宜而殲鋤之不早也朕既遠鑒前轍復追維  
烏闌布通之失故不避寒暑艱辛親涖窮邊三勤薄伐

惟是逆形已著然後徂征怙惡不悛然後按討身先士卒則櫛風沐雨而人皆忘勞指畫軍儲則轉饟饋師而人爭用命茂草茁於荒磧流泉溢於沙陀萬里經行安如枕席非徼神祐曷繇臻此易曰天之所助者順也人之所助者信也朕仰憑天道俯愜人情以萬不得已而用兵之意乘刻不容緩而滅寇之機立拯邊境之毒痛永底中原於清宴昭告

郊

廟適契成謀使非慮出萬全可輕言師旅哉茲前後用兵本末具載卷中覽是編者尚克喻朕心焉

增修皇輿表序

皇輿表一編肇成於康熙己未製序卷端時置几案歷有年所顧原編紀載沿革於郡縣特詳其地列輿圖而未設有郡縣者槩未編入朕惟國家統御方夏覆載之內視均一體外藩蒙古諸屬國自

祖宗朝後先收服次第歸誠迨朕臨御以來蕃王君長

歲時貢琛悉比內地繡壤相錯不啻萬有餘里邇者喀爾喀青海部衆稱臣嚮附土宇益廓計其山川封域斥堠之所屆分野之所屬皆按地而可考也至於山陬海濱新隸職方者二十餘年間建州樹邑往往而有又若朝鮮交趾諸國之奉職惟虔邊徼土目之革心效順亦從來志方輿者所宜備載爰命儒臣更加增輯共十有六卷書成特令刊梓用示來茲於戲幅員延袤亦云廣矣而蕃生息厚風俗之道則實資於廟堂之經理朕開

編循覽深念高卑險易形勢不齊燥濕剛柔風氣各異  
然而秉彛恒性遐邇皆同朕以一身為中外元元主惟  
是張官置吏以牧民生禁暴設防以禦民患既鞠養之  
務徧尤教化之宜周早夜孳孳無日不心通乎四海九  
州之隱書不云乎自朝至於日中昃不遑暇食用咸和  
萬民凡我後人覩是編者知敝造之維艱思懷柔之不  
易則千百禩無疆之歷服其庶克永荷天庥也夫

### 五燈全書序

朕惟天生蒸民厥有恒性迨物交私蔽以後遂不能有  
善而無惡故操治世之權者必兢兢以勸善懲惡為先  
務焉大易著閑邪存誠之義尚書明福善禍淫之旨皆  
所以啓牖下民使之回心嚮道而勿即於匪彝也間嘗  
流覽釋氏之書立教雖主於空寂而其戒欺去妄蠲忿  
窒欲亦與勸善懲惡之道蓋無殊旨焉自宗門教興曹  
溪而下五派迭衍各有撰述宋景德以後裒集為傳燈  
諸錄嗣是又舉挈要領彙成一編是為五燈會元洎乎

本朝沙門海寬念其支派繁衍自宋金元明數百年來  
傳述闕然乃著續續一書今聖感寺僧超永復慮譜牒  
漸勞聞見不一用是旁蒐博考折衷於二編而參訂之  
刪其煩蕪增所未備以成全書其用心也可謂勤矣至  
於簡牘所載互相印證之語罕譬曲喻為說甚夥而其  
大指要歸亦惟欲祛迷惑以復性真不越乎閑邪存誠  
牖人為善之意匪僅有裨於禪宗教旨而已也故為之  
序



清文鑑序

朕惟自昔聖人易結繩以書契用使天下之義理悉歸文字天下之文字悉歸六書六書備而義理無不畢具苟不為講習修明則形聲點畫之制雖存其義幾乎息矣我

太祖高皇帝創業垂訓至仁合於天地肇造清書大文曷如日月

太宗文皇帝上聖之資開天之運繼志紹聞丕宣文治

世祖章皇帝神靈首出智勇天授秉英斷之資持以恭儉擴寬仁之量濟以憂勤朕以涼德膺

祖宗之鴻圖即位多年未嘗晷刻不以法

祖為念兢業自守宵旰靡遑萬幾之暇惟以讀書窮理盡吾之志凡五經四書已經翻譯之外如綱目講義等有關於治道者靡不譯盡近來老成耆舊漸就凋謝因而徵文與旨久而弗彰承謫襲舛習而不察字句偶有失落語音或有不正國書所關至鉅政事文章皆由此

出非詳加釐定何所折衷非編輯成書何以取法爰詔  
儒臣分類排纂日以繕彙進呈朕親御丹黃逐一審訂  
解詁之疑似者必晰同異於毫芒引据之闕遺者必援  
經史以互證或博咨於故老或參考於舊編大而天文  
地理小而名物象數十二字母五聲切音具載集中名  
曰清文鑑用探音聲之本原究字畫之詳盡為部三十  
有六為類二百八十為書二十一卷清文得此而無餘  
蘊凡以明

祖德之源流敬本之深意也易云觀乎人文以化成天下朕仰承

列祖創造之弘模深惟國家同文之盛典歲閱數周彙成全帙誦是編者尚其體朕歷載之勤劬因音聲以求字畫因字畫以求文章繼自今詔令之出納章奏之敷陳以及達於遐陬勒諸琰琬者大經大法咸有據依一話一言式循典則庶幾國書永貽於千百禩而與日星河漢長垂天壤也夫

全唐詩錄序

在昔詩教之興本性情之微導中和之旨所以感人心而美謠俗被金石而格神祇故大舜以教胄子樂正以造俊秀蓋自二帝三王之世固已然矣文武成康之際王澤洽頌聲作洋洋乎洵足以繼薰風之操並卿雲之奏也自時厥後作者彌繁孔子從而刪定之使六義彰明一經燦列錄其忠厚悱惻之辭以寓諷諭戒勉之意天道人事胥於是乎具焉漢魏以還尤多新製體例雖

更前徽未邈至陳隋之末稍凌替矣唐之太宗致治幾  
於三代之隆躬自撰著一時文人才士將相名臣詠吟  
遞發藻采繽紛踵襲雅騷之迹光昭正始之音而歌行  
律絕獨創兼能自遐古以來未嘗有也爰及盛唐逮乎  
中晚或與運會為高下而凡緣時託志觸物攄懷形諸  
翰簡者皆卓然成一家之言弗可廢也朕萬幾餘閑迴  
環覽詠尋其指歸晰其正變而三百年升降得失之故  
亦因以可考焉於是論世觀人即其章句攬其菁英勒

為成書置諸几席每勤披閱加以精研迄於今已歷有  
年所矣頃以視河南巡至於江浙見比閭士庶有吹豳  
擊壤之風獻詩頌者絡繹於途雖其工拙淺深各極其  
不齊之致而衢謳巷舞儼然省方之所採列國之所陳  
亦可見人情之愛戴而先王以詩為教之義濡染而蒸  
陶之者所關甚鉅也翰林侍讀徐倬以全唐詩錄進展  
卷而讀之與朕平時品第者蓋有合焉嘉其耄年好學  
遷秩禮部侍郎以為天下學者之勸乃取茲集親為鑒

定賜以帑金即命校刊俾誦習者由全唐之詩沿波討  
瀾以上溯夫汾泗之傳而游泳乎唐虞載賡之盛其於  
化理人心將大有裨益也矣是為序以弁其端云康熙  
四十五年三月初七日

全唐詩序

詩至唐而衆體悉備亦諸法畢該故稱詩者必視唐人  
為標準如射之就彀率治器之就規矩焉蓋唐當開國  
之初即用聲律取士聚天下才智英傑之彥悉從事於



六義之學以為進身之階則習之者固已專且勤矣而  
又堂陞之賡和友朋之贈處與夫登臨讌賞之即事感  
懷勞人遷客之觸物寓興一舉而託之於詩雖窮達殊  
途悲愉異境而以言乎摠寫性情則其致一也夫性情  
所寄千載同符安有運會之可區別而論次唐人之詩  
者輒執初盛中晚岐分疆陌而抑揚軒輊之過甚此皆  
後人強為之名非通論也自昔唐人選唐詩有殷璠元  
結令狐楚姚合數家卷帙未為詳備至宋初撰輯英華

收錄唐篇什極盛然詩以類從仍多脫漏未成一代鉅  
觀朕茲發內府所有全唐詩命諸詞臣合唐音統籤諸  
編參互校勘蒐補缺遺略去初盛中晚之名一依時代  
分置次第其人有通籍登朝歲月可考者以歲月先後  
為斷無可考者則援據詩中所詠之事與所同時之人  
繫焉得詩四萬八千九百餘首凡二千二百餘人釐為  
九百卷於是唐三百年詩人之菁華咸采擷薈萃於一  
編之內亦可云大備矣夫詩盈數萬格調各殊溯其學

問本原雖悉有師承指授而其精思獨悟不屑為苟同者皆能殫其才力所至沿尋風雅以卓然自成其家又其甚者寧為幽僻奇譎雜出於變風變雅之外而絕不致有蹈襲剽竊之弊是則唐人深造極詣之能事也學者問途於此探珠於淵海選材於鄧林博收約守而不自失其性情之正則真能善學唐人者矣豈其漫無持擇汎求優孟之形似者可以語詩也哉是用製序卷首以示刻全唐詩嘉與來學之旨海內誦習者尚其知朕

意馬

欽定四庫全書

聖祖

仁皇帝御製文第三集

卷二十

十二

聖祖仁皇帝御製文第三集卷二十

欽定四庫全書薈要

聖祖仁皇帝御製文第三集卷二十一目錄

序

資治通鑑綱目全書序

佩文韻府序

淵鑑類函序

歷代賦彙序

清涼山新志序

四朝詩選序

欽定四庫全書薈要卷一萬三千一百五

集部

聖祖仁皇帝御製文第三集卷二十一

序

資治通鑑綱目全書序

朕惟自古帝王言動必記而史事以興顧周禮外史所掌卷帙寢繁即紀傳亦異千百年來微言大義昭揭天壤必以尼山筆削為斷所從來尚矣粵自龍門而降累朝國乘體製略同涑水司馬氏易分類為合編蓋猶左



氏法也紫陽朱子特起而振舉之綱以提要目以備詳  
歲時列於上而天統明章程繫於下而人紀立增損精  
切予奪謹嚴庶幾春秋大居正之宗指與雖其間事例  
槩括稍有脫誤大都門人一時采輯之過實非晦菴本  
意也自時厥後有前編有外紀有大紀續編以及考證  
集覽發明質實之類諸家論著不一而足要皆商確折  
衷互相參訂明儒陳仁錫裒集而剴劂之不可謂非先  
哲之功臣也朕幾務之暇留神披閱博稽詳考纖悉靡

遺取義必抉其精微辭必搜其奧析疑正陋釐異闡幽  
務期法戒昭彰質文融貫前後所著論斷凡百有餘首  
茲允諸臣請並以付梓頒布宇內俾士子流傳誦習開  
卷瞭然不特天人理欲之微古今治忽之故一一臚如  
指掌即子朱子祖述宣尼維持世教之苦衷並可潛孚  
默契於數千載之下是則朕敦崇古學作新烝民之至  
意也爰敘述以冠篇端用昭示於無窮焉

佩文韻府序

朕萬幾在御日昃宵分未遑自逸時當燕閒不輟問學  
羣經子史誦其文而晰其義矣以至百家之書凡可以  
裨世教勵民風者修明補正罔使闕遺嘗謂韻府羣玉  
五車韻瑞諸書事繫於字字統於韻稽古者近而取之  
約而能博是書之作誠不為無所見也然其為書簡而  
不詳略而不備且引據多誤朕每致意焉欲博稽衆籍  
著為全書爰於康熙四十三年夏六月朕與內直翰林  
諸臣親加考訂證其訛舛增其脫漏或有某經某史所

載某字某事未備者朕復時時面諭一一增錄漸次成帙猶以故實或未極博於十月復命閣部大臣更加蒐采以裒益之既有原本增本又有內增外增將付剞劂矣名曰佩文韻府隨於十二月開局武英殿集翰林諸臣合併詳勘逐日進覽旋授梓人於五十年十月全書告成共一百零六卷一萬八千餘頁囊括古今網羅鉅細韻學之盛未有過於此書者也書成諸臣請序朕念自初至今經八年矣歷寒暑之久積歲月之勤朕於此

書政事之暇未嘗惜一日之勞也朕又嘗諭諸臣從來著一大書非數十年之功不能成今數年以來所成大部書凡十有餘種若非合衆人之力豈能刻期告竣故凡先後預事諸臣皆命列名其中茲序佩文韻府因備記編撰之始末遂及修集諸書之大指以見成書之不易如此

淵鑑類函序

朕幾務餘暇博涉藝林每覽一書必盡其全帙沉潛往

復既得其始終條理精義之所存而文句英華亦常讀之矣嘗謂古人政事文章雖出於二然文章以言理政事則理之發通而見遠者也豈僅以其區區文句之間而可以自命為學術乎自六朝乃有類書而尤盛於唐此豈非求之文句之間者哉雖然理之所寓於斯萃焉弗可廢也昔者孔子之繫易也曰方以類聚又曰本乎天者親上本乎地者親下則各從其類也於諸卦則曰其稱名也小其取類也大蓋以天下古今事物之理畢

具於易而易之為書因理象物因物徵辭以斷天下之疑而成天下之務者各從其類以明之然則類書之作其亦不違於聖人立言之意歟書之最著者藝文類聚北堂書鈔初學記白帖杜氏通典宋明以來撰者寔廣若博而不繁簡而能覈者抑亦鮮矣獨俞安期唐類函頗稱詳括大抵祖述歐陽詢之類聚稍刪存書鈔初學記白帖通典而附益之安期明人也而曰唐類函者以其皆唐輯也既缺宋以來書而唐以前亦有脫漏者爰

命儒臣逖稽旁搜泝洄往籍網羅近代增其所無詳其所略參伍錯綜以摛其異探賾索隱以約其同要之不離乎以類相從而類始備焉書成計四百五十卷夫自有類書迄於今千有餘年而集其大成可不謂斯文之少補乎學者或未能盡讀天下之書觀於此而得其大凡因以求盡其始終條理精義之所存其於格物致知之功修辭立誠之事為益匪淺渺矣

歷代賦彙序



賦者六義之一也風雅頌興賦比六者而賦居興比之中蓋其敷陳事理抒寫物情興比不得並焉故賦之於詩功尤為獨多由是以來興比不能單行而賦遂繼詩之後卓然自見於世故曰賦者古詩之流也班固又謂登高能賦可以為大夫言感物造端材智深美可以與國政事故可以為列大夫也是則賦之於詩具其一體及其闕肆漫衍與詩並行而其事可通於用人書曰敷奏以言夫敷奏者有近乎賦之義使堯舜而在今日亦

所不廢則豈非文章之可貴者哉朕嘗於幾務之暇博  
觀典籍見古者諸侯卿大夫交接鄰國時稱詩以喻志  
不必其所自作皆謂之賦如晉公子重耳賦六月魯文  
公賦菁菁者莪鄭穆公賦鴻雁魯穆叔賦祁父之類皆  
取古詩歌之以喻其志即詠吟之遺音得心意之所存  
使聞之者足以感發興起而因以明其如相告語之情  
猶之敷布其義而直陳之故謂之賦也春秋之後聘問  
詠歌不行於列國于是羈臣志士自言其情而賦乃作

焉其始創自荀况宦遊於楚作為五賦楚臣屈原乃作  
離騷後人尊之為經而班固以為屈原作賦以諷諭則  
已名其為賦矣其後宋玉唐勒皆競為之漢興賈誼枚  
乘司馬相如揚雄張衡之流製作尤盛三國兩晉以逮  
六朝變而為排至於唐宋變而為律又變而為文而唐  
宋則用以取士其時名臣偉人往往多出其中迨及元  
而始不列於科目朕以其不可盡廢也間嘗以是求天  
下之才故命詞臣考稽古昔蒐采缺逸都為一集親加

鑒定令校刊焉為叙其源流興罷之故以示天下使凡為學者知朕意云康熙四十五年三月二十日

清涼山新志序

朕惟清涼山古稱文殊大士演教之區也茲山聳峙於鴈門雲中之表接恒嶽而俯渟沱橫臨朔塞藩屏京畿其地風勁而高寒層冰結於陰巖積雪留於炎夏故名清涼然地雖寒而嘉木芳草蒙茸山谷稱靈異焉五峰竦立上矗霄漢日月之所廻環煙霞之所虧蔽蒼然深

秀其為神臯奧區蓋自昔而已然矣是以自漢迄今歷  
代皆有崇建古刹精藍遍滿巖岫宇內稱靈山佛土最  
著者有三峨嵋普陀而五臺為尤盛焉我

世祖章皇帝上為

慈闈祝釐下為蒼生錫福賜金遣使屢沛

恩施朕數經駐蹕茲山為

兩宮祈康寧福祉因而登五峰陟臺懷各為文勒石以  
紀之琪樹靈葩形於篇詠蓋嘗念佛教以清淨慈惠為

本以戒定智慧為宗亦有裨於勸善遠惡茲山又密邇  
塞垣遠離塵俗當為清修者之所棲泊故於此每惓惓  
焉山之有志所以紀形勝述建置載藝文俾後之人有  
所稽考往蹟舊聞不致湮沒茲編詳簡適中不蕪不支  
清涼勝境可撫卷而得其梗槩也因叙於簡端康熙四  
十年五月初三日

### 四朝詩選序

生民之始稟二儀之精含五常之性而其理具於一心

人心之靈日出而不窮詩大序謂在心為志發言為詩其闡明虞廷言志之意而歸本於心者其意深矣蓋時運推移質文屢變其言之所發雖殊而心之所存無異則詩之為道安可謂古今人不相及哉觀於宋金元明之詩而其義尤著焉世之論詩者謂唐以詩賦取士故唐之詩為獨盛夫唐之詩誠盛矣若夫宋之取士始以詩賦熙寧專主經義而罷詩賦元祐初復詩賦至紹聖而又罷之其後又復與經義並行金大略如宋制元自

仁宗罷詩而存賦明則詩賦皆罷之士於其時以其餘力兼習有韻之言專之則易美兼之則難工而其至者亦往往婉北宋而追三唐豈非人心之靈日出而不窮者歟此又可見古今人不甚相遠也朕夙興夜寐永圖治安念養士育才國家盛典考言詢事曩代良規亦既試之制藝使通經術兼以論表判策俾達古今而於科目之外時以詩賦取人每當省方觀民之會士之所進詩賦古文止輦受觀停舟延問親試而拔其尤者亦多



矣蓋舉斯世而措之禮陶樂淑之中被以溫柔敦厚之  
教故所以獎勸之者靡弗至焉近得全唐詩已命儒臣  
校訂刊布海內由唐以來千有餘年之久流傳自昔未  
見之書亦可謂斯文之厚幸矣遂又命博採宋金元明  
之詩每代分體各編自名篇鉅集以及斷簡殘章固有  
闕遺稍擇而錄之付之剞劂用以標詩人之極致擴後  
進之見聞譬猶六代遞奏八音之律無爽九流並遡一  
致之理同歸然則唐以後之詩又自今而傳矣夫詩之

日遠而日新如此而皆本於人之一心孔子云詩三百一言以蔽之曰思無邪子之言詩法也即心法也子夏味絢素之章子貢悟琢磨之句二子者一以文學列於四科一以多識得聞一貫朕於是有以見夫天之所以畀於人者此心此理隨在流通願學者謹其所存而審其所發將以上達夫大本大原而充廣乎萬事萬物豈惟詩之為道也哉



聖祖仁皇帝御製文第三集卷二十一

總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書

集部

聖祖仁皇帝御製文三集卷二十四

二五

詳校官原任編修臣徐立綱

欽定四庫全書薈要

聖祖仁皇帝御製文第三集卷二十二目錄

序

詠物詩選序

歷代題畫詩類序

歷代詩餘選序

書畫譜序

廣羣芳譜序



記

水性記

黃船記

避暑山莊記

欽定四庫全書薈要卷一萬三千一百六

集部

聖祖仁皇帝御製文第三集卷二十二

序

詠物詩選序

昔者子夏序詩謂正得失動天地感鬼神莫近於詩先王以是經夫婦成孝敬厚人倫美教化移風俗若是乎詩之道大矣哉而周公續述唐虞宗翼文武制禮以導天下著爾雅一篇後之序之者謂爾雅所以通詁訓之



指歸叙詩人之興詠疏之者曰爾雅所釋徧解六經而獨云叙詩人之興詠者以爾雅之作多為釋詩是則一物多名片言殊訓凡以蟲魚草木之微發揮天地萬物之理而六義四始之道由是以明焉故夫詩者極其至足以通天地類萬物而不越乎蟲魚草木之微詩之詠物自三百篇而已然矣孔子曰邇之事父遠之事君多識於鳥獸草木之名夫事父事君忠孝大節也鳥獸草木至微也吾夫子並舉而極言之然則詩之道其稱名

也小其取類也大即一物之情而關乎忠孝之旨繼自  
騷賦以來未之有易也此昔人詠物之詩所由作也歟  
朕自經帷進御覃精六籍至於燕暇未嘗廢書於詩之  
道時盡心焉爰自古昔逸詩漢魏六朝洎夫有唐訖於  
宋元明之作博觀耽味纂其蕭裊掇其菁英命大學士  
陳廷敬尚書王鴻緒校理之翰林蔡升元楊瑄陳元龍  
查昇陳壯履勵廷儀張廷玉錢名世汪灝查慎行蔣廷  
錫編錄之名曰佩文齋詠物詩選蓋蒐采既多義類咸

備又不僅如向者所云蟲魚鳥獸草木之屬而已也若  
天經地志人事之可以物名者罔弗列焉於是鏤板行  
世與天下學文之士共之將使之由名物度數之中求  
合乎溫柔敦厚之指充詩之量如卜商氏之所言而不  
負古聖諄復詁訓之心其於詩教有裨益也夫康熙四  
十五年六月二十一日

歷代題畫詩類序

粵攷有虞氏施采作繪而繪事以起周禮冬官爰有設

色之工典畫續之職傳所稱火龍黼黻昭其文三辰旂  
旗昭其明者是也至漢世圖寫功臣用示褒異則又人  
物之肖象粲然著見於史冊者矣嗣是工繪事者日衆  
自天文地輿鳥獸草木以及宮室器用與一切登臨遊  
覽之勝皆假圖畫以傳於世晉宋而後莫盛於唐五代  
迄宋作者輩出金元明間亦代有聞人方其詣精入理  
足以體陰陽含飛動為稽古博物者之所取證不僅以  
丹青擅長而已而能揆挾其義蘊發摠其旨趣者則尤

藉有題畫之詩歷代各體題詠以萬計散置諸集無所  
統紀翰林陳邦彥裒輯彙鈔得八千九百餘首分為三  
十類編次一百有二十卷繕本呈覽朕嘉其用意之勤  
命授工鉅梓茲刊成裝潢來上萬幾餘暇時一披閱凡  
兩間之名象庶類之棼錯無不該載於中且不踰几席  
而得流觀山川險易之形近在目前而可考鏡往代留  
遺之蹟以至農耕蠶織悉具陳鷄犬桑麻宛然如覩  
庶幾於昔人豳風無逸之圖有互相發明者焉夫圖繪

藝事也而近於道題畫詩之一類也而通於治杜甫詩  
謂繪事功殊絕幽襟興激昂讀是編者可以觸類而知  
所務矣爰製序題於卷端以識始末云康熙四十六年  
四月十六日

歷代詩餘選序

詩餘之作蓋自昔樂府之遺音而後人之審聲選調所  
由以緣起也而要皆昉於詩則其本末源流之故有可  
言者古帝舜之命夔典樂曰詩言志歌永言聲依永律

和聲可見唐虞時即有詩而詩必諧於聲是近代倚聲

之詞其理固已寓焉降而殷周孔子刪而為三百五篇

樂正而雅頌得所考其時郊廟明堂升歌宴饗以及鄉

飲報賽莫不有詩以叶於笙簫琴瑟之間自詩變為騷

騷衍為賦雖旨兼出乎六義而聲弗拘於八音至漢而

郊祀房中饒歌鼓吹琴曲雜詩皆領於樂官于是始有

樂府名迄於六代操觚之家按調屬題徵辭赴節日趨

婉麗以導宮商唐興古詩而外創為近體而五七言絕

句或傳於伶人顧他詩不盡協於樂部其間如李白之清平調憶秦娥菩薩蠻劉禹錫之浪淘沙竹枝詞洎溫庭筠韋莊之徒相繼有作而新聲迭出時皆被諸管絃是詩之流而為詞已權輿於唐矣宋初其風漸廣至周邦彥領大晟樂府比切聲調篇目頗繁柳永復增置之詞遂有專家一時綺製可謂極盛雖體殊樂府而句櫛字比廉肉即奏不爽寸黍其於古者依永和聲之道洵有合也然則詞亦何可廢歟朕萬幾清暇博綜典籍於



經史諸書有關政教而裨益身心者良已纂輯無遺因  
流覽風雅廣識名物欲極賦學之全而有賦彙欲萃詩  
學之富而有全唐詩刊本宋金元明四代詩選更以詞  
者繼響夫詩者也乃命詞臣輯其風華典麗悉歸於正  
者為若干卷而朕親裁定焉夫詩之揚厲功德鋪陳政  
事固無論矣至於桑中蔓草諸什而孔子以一言蔽之  
曰思無邪蓋蕙臣可以比賢者嚶鳴可以喻友生苟讀  
其詞而引伸之觸類之範其軼志砥厥貞心則是編之

含英咀華敲金戛玉者何在不可以思無邪之一言該之也若夫一唱三歎譜入絲竹清濁高下無相奪倫殆宇宙之元音具是推此而沿流討源由詞以溯之詩由詩以溯之樂即籥韶九成其亦不外於本人心以求自然之聲也夫康熙四十六年七月十二日

書畫譜序

書者六藝之一昔柳公權言心正則筆正程子謂作字須敬即此是學蓋以紀事載言行之天下垂之久遠書

誠重矣夫書以傳其意而畫以肖其形事若不相侔其義有可連類而並論者焉蒼頡史皇以來歷代載籍多能道之而時數相推材智間出繁重者變而之簡易樸拙者漸而之巧麗亦天地自然之理也其初古文繼為篆隸而今之所謂真書行草三者實權輿於斯矣然三者皆肇興於漢逮夫魏晉去古未遠多見古人篆隸故鍾繇書有其遺法而王羲之鍾美垂徽祧前啓後士林所稱以為歸極已若圖畫之事始自秦漢盛於六朝其

間作者輩出曹衛顧陸擅能於前董展孫楊流聲於後  
隋有何鄭唐則閻吳大抵皆畫佛像人物下筆輒依故  
事迨氣韻之超極於潑墨寫生之精窮於沒骨而畫之  
變盡焉朕萬幾燕閒披覽典冊間臨書家名蹟每觀前  
代紀錄書畫諸書種類錯互漫無統紀遂即佩文齋所  
有者編葺之使各以類相從為一百卷凡書畫之源流  
古今工於此者之姓氏以至聞人之題跋歷代之鑒藏  
悉備攷而慎其擇亦可謂詳且盡矣昔唐太宗好書親

序王羲之傳自以為心慕手追而當時內府之圖籍亦  
號最盛迄於今日流傳者日遠日少晉唐已為隆古而  
況前此者乎然溯流者必窮其源習今日之書而不推  
本於篆隸亦猶齊末之觀也故上自蒼頡史皇下暨近  
代皆列焉朕於書畫偶有題跋檢出數十則以為一卷  
從諸臣之請也要之尚稽曩昔用以攄適性情泳陶清  
暇附於古聖人游藝之意並為世之嗜古者樹毫楮之  
標準引考索之旨趣則牙籤萬卷之中是編其亦可以

永傳也夫康熙四十七年二月

廣羣芳譜序

粵自神農氏嘗草辨穀民始知樹藝醫藥伊耆氏命羲和推步定厯以授時民始知耕穫之不愆而百工績熙偉哉開物成務啓牖來茲聖帝之功與天地並矣朕聽政之暇披閱典籍留意農桑繪耕織之圖製永言之什時巡所至親歷田間其稼穡之艱難作勞之辛苦既周知而洞悉矣每思究百昌生殖之理極萬變消長之情

著為成編以佑吾民嘗謂爾雅具其名物而郭璞陸佃  
孫炎之流疏注埤翼又加詳焉其明備者莫如本草自  
本經以迄陶宏景蘇頌而下數十種凡採治之法無不  
該核他如齊民要術月令廣義諸書其蒔植之宜為更  
晰矣遐稽往牘擷其英華歸於簡括良匪易也比見近  
人所纂羣芳譜蒐輯衆長義類可取但惜尚多疎漏因  
命儒臣即祕府藏帙擴摭薈萃刪其支冗補其闕遺上  
原六經旁據子史洎夫稗官野乘之言才士之所歌吟

田夫之所傳述皆著於篇而奇花瑞草之產於名山貢  
自遠徼絕塞為前代所未見聞者亦咸列焉復允廷臣  
之請益以朕所賦詠依類分載總一百卷命名曰佩文  
齋廣羣芳譜冠以天時尊歲令也次穀次桑麻崇民事  
也次蔬茶果木花卉資厚生溥利用也終以藥物重民  
命也其諸天時蚤晚之候人事種溉之方地力彼此之  
殊物性良楮之異罔弗條舉縷析燦然可觀焉是書也  
攬品彙之蕃滋想羣生之率育一展卷間化機洋溢於



茲畢呈固不惟矜淹洽侈藻麗也以是刊布天下垂之  
久遠使吾民優游於農圃之中家室盈寧樂其業而不  
憚其勤而大夫士以及民之秀者因以區別物宜審其  
淑慝凜嗜好之常慎節宣之度於以躋仁壽而享泰平  
亦不為無所裨助也哉康熙四十七年五月初十日

記

水性記

朕察各處水性之根原或根於土或根於沙或根於鹽

或根於鹹或根於火硝或根於硫磺人之五臟六腑雖有六淫之所侵人且知之者多却不防因水性而成其患者愈難明也南北地殊川源藪澤輕清混濁之不同偶耳霧露雪霜山水暴漲即非水之本性人所難略也所以朕南北各處最防水之輕重關於飲食故試之水二斤盛於銀器中坐於滾水之上將水耗乾或土或沙或鹽或鹹歷歷無不分明終無奈何惟取氣酒之法用甌取其氣成水而後用之治水之法莫過於此不分南

此不論藪澤即海水臭泥皆可以成甘露養生之要最  
為所關故援筆以記之

### 黃船記

黃船者並無別名似戰艦之尾故有將臺不施彩畫以  
樸是本外堅內寬以便為足朕每視民瘼巡方水陸非  
舟即馬所以損益厥中並宜南北而後成之故屢臨淮  
黃問俗江浙偶遇波濤萬頃人心可駭之際凝然不動  
聲色者豈非舟之備於全乎古人有言家有千金坐不

垂堂每覽書史輒感興歎擴而充之不止舟也治天下之道蓋亦如是先曾作操舟之說矣今復論及若非深識江淮河漢之經地則南北東西水性茫然矣不分山川朔漠之形勢則好尚土俗人情不明矣槩不可同語也舟乃細物非篙工楫師之良雖桂棹蘭橈不過虛設之物豈自為我用乎所以隨才器使人地相宜而不求全責備者正為此也故人能施技物皆應手預防備患手先安然無虞於後雖狂風鉅浪有何懼哉凡事豫則

立不豫則廢者即聖人亦不外乎是况不及聖人乎朕  
每有動莫論巨細心得實見諮之於衆信之於已方敢  
行也一事一物未嘗草草疎忽亦不少違於理故船窗  
幾暇不揣無文援筆以作記

避暑山莊記

金山發脈暖溜分泉雲壑潄泓石潭青靄川廣草肥無  
傷田廬之害風清夏爽宜人調養之功自天地之生成  
歸造化之品彙朕數巡江干深知南方之秀麗兩幸秦

隴益明西土之殫陳北過龍沙東遊長白山川之壯人  
物之樸亦不能盡述皆吾之所不取惟茲熱河道近神  
京往來無過兩日地闢荒野存心豈誤萬幾因而度高  
平遠近之差開自然峰嵐之勢依松為齋則竅崖潤色  
引水在亭則榛煙出谷皆非人力之所能借芳甸而為  
助無刻桷丹楹之費喜泉林抱素之懷靜觀萬物俯察  
庶類文禽戲綠水而不避麇鹿映夕陽而成羣鳶飛魚  
躍從天性之高下遠色紫氛開韶景之低昂一遊一豫

罔非稼穡之休戚或旰或宵不忘經史之安危勸耕南  
畝望豐稔筐筥之盈茂止西成樂時若雨暘之慶此居  
避暑山莊之概也至於玩芝蘭則愛德行睹松竹則思  
貞操臨清流則貴廉潔覽蔓草則賤貪穢此亦古人因  
物而比興不可不知人君之奉取之於民不愛者即惑  
也故書之於記朝夕不改敬誠之在茲也

欽定四庫全書薈要

聖祖仁皇帝御製文第三集卷二十三目錄

碑記

普濟堂碑記

高旻寺碑記

補陀羅迦山普濟寺碑記

重修清涼山羅睺寺碑記

碑文



重修天竺寺碑文

南海補陀法雨寺碑文

廣仁寺碑文

重修南嶽廟碑文

重修西嶽廟碑文

欽定四庫全書薈要卷一萬三千一百七

集部

聖祖仁皇帝御製文第三集卷二十三

碑記

普濟堂碑記

京師廣寧門外有普濟堂焉門臨孔道地接神區萃萬國之梯航普兆民之樂利熙來攘往之衆胥慶春臺肩摩轂擊之倫咸登壽域然而川塗跋涉易興趺足之嗟風雨晦明難遂棲身之願或徘徊岐路最急貲糧或偃

蹇孱軀尤需醫藥於是都人尚義上戶輸金託此三乘  
之津梁用濟四生之疾苦慈雲法雨資佛力以醒羣迷  
夕咀晨鐘贊王化以弘大澤寒得衣而饑得食羈旅如  
歸病有託而療有方疲癯立起既安全之甚衆且存歿  
之皆寧有司以聞深為嘉悅夫好義輕施乃良民之美  
行恤災拯患寔盛世之休風喜見我民還敦古道咸能  
體朕憂民之念推朕救民之心創建雖肇乎都城效法  
期及乎寰宇成比戶可封之俗慰一夫不獲之懷書傳

從欲於四方詩詠徧德於百姓此則朕之志也爰賜之  
額曰膏澤回春而為之記康熙四十四年五月

高旻寺碑記

茱萸灣者乃維揚俗稱寶塔灣也居三岔河之中南眺  
金焦諸峰北枕蜀岡之麓足為淮南勝地凡上江由儀  
真下江由瓜步至此皆會歸運河而北上也朕比歲以  
來躬臨河干諮詢經畫者屢矣每抵一處未嘗不懷保  
編氓施惠工商故兩淮鹽課永減額徵停輸贏羨又聞

往來迎送費用私派者甚鉅特頒嚴旨盡為禁止從此  
商民得以安席漸皆獲所則朕之巡幸者少有益乎朕  
三十八年奉

皇太后鑾輿偕行晨昏侍養視河既畢勉從輿請濟江  
而南周覽吳會民生風俗見茱萸灣歲久寢圯朕欲頒  
內帑略為修葺為

皇太后祝釐而衆商以被澤優渥不待期會踴躍赴功  
庀材協力惟恐或後不日告竣舊刹式廓鼎新莊嚴弘

敬兼以輦飛傑閣憑高四眺臨大江通南北因書額賜之曰高旻寺勒文於石永垂久遠惟是雨暘應時河海清晏舉一世共臻於仁壽之域斯四十餘年宵旰勤民之念所厚期也即此塔工歲事具見羣情愛戴之誼出於至誠是亦有不可泯者爰為書之以志始末云

補陀羅迦山普濟寺碑記

稽考梵書補陀羅迦山有三一居厄納忒黑一居忒白忒一居南海即是山也本山誌書未得其詳當年海寇

猖狂凡禁海之外寺宇梵刹皆為灰燼自康熙二十二年蕩平臺灣海波永息故遊方衲子因舊基址斬蓬蒿刈藜藿而更新焉朕時巡浙西特遣專官虔修淨供敬書題額永鎮山門復發帑金重修寺宇務俾殿堂廡牖丹碧華煜焚燎煥美而一木一石悉出公家一夫一役不煩民力上為

慈闈延禧下為蒼生錫祉也朕自弱齡誦讀經史以修齊治平為本未暇覽金經貝葉空寂泡影之文所以不

能窺其堂奧槩而言之元者善之長也佛者以善為本  
推而擴之大約無二上天好生化育萬彙大士慈悲度  
盡衆生亦無二也朕求治勤民四十餘載矣今者兵革  
已銷而民生未臻康阜梗頑雖化而民情未盡淳良皆  
因水旱靡常豐歉各異此朕寤寐孳孳不能釋也以大  
士之力庶幾慈雲法雨甘露祥風使歲稔人安萬姓仁  
壽則普濟之弘功即時雍之上理是朕之心也夫爰書  
翰簡勒諸穹碑垂示無盡云康熙四十五年歲次甲申



嘉平月上旬書

重修清涼山羅睺寺碑記

朕省方觀民所過名山大川壯觀勝蹟與夫往聖先賢  
講學明道之地心切向往多所表章而釋氏之宮標靈  
顯異所在多有亦間留題以寄遐懷嘗一再至五臺山  
慨然於清涼真境如游崆峒汾水之間登眺五峰俱賜  
扁額維茲羅睺寺其地近文殊現相處其取義似皈依  
西方十六祖創建自唐顯迹於宋續修於勝國賢藩迨

我

先朝曾闢院以供十方暨朕躬亦嘗寵以翰墨而日月  
既久壞題傾圯赤白漫漶今住持僧元旦復規而新之  
加麗焉夫浮屠義不三宿則無地非桑下也以無所住  
為常住亦何處不清涼也然其過化之所往往留精舍  
焉亦弟子職也往聞羅睺擊鐘集大眾以別聲聞而宋  
丞相張商英嘗見神燈茲寺中則今元旦之舉於將廢  
也鐘聲燈影或者復聞聞而見見乎因援筆而賜之記

康熙四十五年二月

碑文

重修天竺寺碑文

朕御歷凝庥心周區域省方設教蹕駐湖山眷茲民力  
於東南距止皇輿之名勝若廼因其舊蹟無侈前觀則  
天竺寺之所由以重修也粵惟鷺嶺著於西方法輪則  
一竺峰麗於南國名利維三固緇梵所薰修亦僊靈之  
窟宅潮音送響遙接普陀塔影橫空長留舍利瑞光發

於澗上竒木像大士之容白衣感夫夢中淨域建看經  
之院或旱乾間作木麥告枯而幡蓋來迎靈雨濡足有  
禱輒應無福不臻斯固歷晉宋以迄今寔亦載簡編而  
可信意者能仁之量等於好生佛道之成關乎民隱推  
斯指也不其偉與將使般若之門隨方而啟仁壽之域  
舉世咸登有其興矣曷可廢哉朕曩者親奉

慈闈式臨茲宇自芳湖而西顧望初地以南循輦過花  
迎旌迴雲捲巖深乳竇含真珠之寶光峰轉飛來帶琉

瑞之紺色百靈斯護七聖不迷既祝我

皇太后壽履康寧復冀凡茲庶民室家盈慶然則迦釋  
之弘慈與國家之布德豈有殊也顧念山靈如昔寺貌  
未新我

皇太后為國發心為民祈福時申

慈命重葺香林茲役之興不妨民事凌雲再煥將無乾  
竺之靈匪日成功實篤坤元之慶恒沙國土偕常樂以  
同升億萬蒼生享太平而無極是則我

皇太后之聖心依然迦釋之心而於朕經營天下利濟生民之心亦適有愜也夫

南海補陀法雨寺碑文

蓋聞圓通妙象般若真源開覺路於金繩大地證菩提之慧聞潮音於碧海恒沙誦普度之聲紺殿維新滄波永靜惟茲法雨寺者南海補陀山大士之別院也名山佛國大海慈航青嶂干霄高逼梵天之上洪濤浴日祥開淨土之場一柱如擎震旦指為名勝三山可接方輿

記其神奇值氛祲之震驚致山川之閒寂僧徒雲散佛  
宇灰飛比者運值清寧慶海波之不作地連溟渤望法  
界而知歸特頒內府之金重建空王之宅鳩工揆日葺  
屋不勞庀材築基磬鼓弗作珠宮貝闕涵聖水以無邊  
鼇柱鼉梁覺迷津之可渡坐青蓮之寶像圓滿輪輝藝  
紫竹於祇林莊嚴毫相瞻慈雲之普照錫法雨之嘉名  
海若效靈天吳護法標霞高建來萬國之梯航彼岸可  
登作十方之津筏藉其廣大上以祝

聖母之遐齡假此慈悲下以錫羣黎之多福則梅檀香  
外盡成仁壽之區水月光中悉是涵濡之澤勒諸琬琰  
昭示來茲康熙四十三年十一月

廣仁寺碑文

朕存心天下瞻顧西陲惟茲關隴之區實切封疆之重  
歲當癸未特舉時巡省方設教訓吏寧人已責除租行  
慶布德引年賜帛獎學興賢所過山川聖哲祠域遣修  
祀事用殫精禋凡所以裨邦政厚民生者靡弗致其勤



焉又以運際承平無忘武備簡稽將士整飭戎行發內帑之金錢普軍中之頒給爰於演武之場躬親校射之典以建威銷萌之義有觀德習禮之風顧念久安長治務在因俗宜民若乾竺之傳言雖殊尚而利濟之道指有同歸閱武之頃周覽地形相其爽塏命創招提即大賚之餘貲為雙林之小築厥工匪侈逾載告竣斯役也經營適協乎輿情銖黍不煩夫民力將使黃山巖岫秀比靈山渭水波濤凝如定水洪河浪息渡法海之津梁

華嶽雲開通耆閣之轍迹五陵六郡之衆廻向香城外  
蕃屬國而遙羣遊淨土貢神光之常護上以祝

慈壽於無涯助王化之遐宣下以錫民庥於有永其亦  
朕綏懷寰宇順導烝黎之至意也歟於是題廣仁之額  
標括三乘書多寶之碑昭垂奕葉云爾康熙四十四年  
十一月初一日

重修南嶽廟碑文

衡嶽為天南巨鎮上應北斗玉衡亦名壽嶽主靈長於

祿位綿福祚於子孫載在星經由來尚已往歲專官致  
祭肅薦馨香復以廟貌傾頽勅命修葺蠲吉歲事鳩工  
庀材不斂閭左之錢不費公旬之後羣臣歡忭庶民子  
來經始於四十四年七月訖工於四十六年九月不三  
歲而落成榱桷一新丹碧重煥於時億萬臣民以茲嶽  
為主壽之山咸欲伸其愛戴之悃為朕祝釐而督撫諸  
臣亦合詞籲請謂宜親頒文翰宣導輿情朕以萬邦為  
懷踐祚以來殫思治理區畫周詳敬

天勤民不遑暇逸而於嶽瀆諸祀典禮必虔凡以洽神  
人和上下也維茲南嶽靈爽斯憑亦期與吾民共樂雍  
熙同登仁壽大四海從風之治固萬年有道之基是則  
朕斂時錫福之至願云爾爰書重修歲月以示崇德報  
功之意俾勒之貞珉昭諸億禩焉

重修西嶽廟碑文

天地定位山嶽效靈體發育之能贊生成之德尊踰四  
瀆秩視三公祀典之於五嶽禮綦重矣矧華山峻峙雍

州雄踞西土辨方維酉兆歲事於有秋盛德在金助氣  
機之始肅興雨則膏流河渭出雲而氣接恒嵩尤宇宙  
之與區神祇之靈府也嶽廟當華陰衢道基址崇宏棟  
梁巍煥明裡盼蠻降格居歆國家之邀福迓禧以大庇  
我陝東西數千里之蒼黔者於是乎在而年歲浸久則  
傾圯漫漶不能無虞朕於癸未冬省方西巡蒞止少華  
之麓矚雲臺望仙掌靈蹤勝蹟髣髴於煙嵐翠靄間而  
西連隴坂東接函關土俗民風停車坐悉秋露凝而勤

收獲商飈起而謹蓋藏年穀屢豐閭閻日阜自非神庥  
曷克臻此於是入祠展謁遣祭致虔特命所司鳩工載  
葺不興一役輪奐丕新葺收之別館增輝少昊之下都  
彌綯自今以始達精忱於玉帛陳黍稷之馨香默佑潛  
孚嘉祥翕集佐坤靈以作成萬物弘允澤而利濟羣方  
豈有量哉爰勒豐碑用垂奕禩康熙四十四年十月初  
一日

聖祖仁皇帝御製文第三集卷二十三

欽定四庫全書薈要

聖祖仁皇帝御製文第三集卷二十四目錄

碑文

五臺山棲賢寺碑文

五臺山顯通寺碑文

五臺山湧泉寺碑文

五臺山廣宗寺碑文

五臺山白雲寺碑文



東嶽廟碑文

穹覽寺碑文

北鎮廟碑文

隆興寺碑文

重修西頂廣仁宮碑文

欽定四庫全書薈要卷一萬三千一百八 集部

聖祖仁皇帝御製文第三集卷二十四

碑文

五臺山棲賢寺碑文

蓋惟鷲嶺西來西土旋移樂土鳳林東望東臺即是春  
臺漸近神京雲湧一峯獨秀迴翔震旦蓮開五朶齊明  
谷鋪錦繡之花輝連忍草溝注清涼之水法具慈航名  
高選佛之場眺瀛洲而若鏡跡表棲賢之社探石洞以

如霞儼然證道之區允矣降真之所昔者大士於此現身早証圓通闡從聞思修之教顯標真實偕隨聲應感之緣曾爲七佛之師化宣累劫今作十方之主澤普羣生幸茲常喜之國都瞻禮妙德之相好出緡錢於內帑香火頻仍啟傑構於靈山莊嚴斯在祇園遐敞地分五百坤輿寶座一乘光遍三千世界禪枝影靜願風雨之調均覺海波澄信金湯之擁護祝

慈有慶九天之壽域長新綿祚無疆兆姓之福田永賴

磬鐫貞石託記載於斯文抒寫至懷俾昭垂於來許

五臺山顯通寺碑文

山分五頂亘右輔之雄區地接三霄顯西方之化域惟  
大士棲真之所高揭獅牀爲竺蘭演教之場羣標鴈舍  
靡不矗瓊梯於碧漢耀琳宇於丹巖茲顯通寺者創自  
永平闢大孚之靈蹟拓於元魏增善住之崇基唐宗始  
易前稱勝代再頒嘉號玉花園畔紺雨繽紛甘露津邊  
璇源滴瀝神燈煥彩散列巘以千星飛閣翔空絢明霞

於萬疊洵臺懷之上刹恒朔之名藍也朕駕鑾輅以時  
巡望鷺峯而企嚮身雲忽湧陟初地之清涼心月常圓  
燭慧光之鴻朗特捐淨施香界重開聿改舊觀熏修倍  
肅石上辟支現影顯示吉祥函中舍利升輝盡生歡喜  
歲蕤紫茵宛同四照交枝曲折紅泉即是八功衍派上  
以繇

慈闈之景算壽嶽彌崇下以錫兆姓之繁禧祥河普潤  
爰鐫片碣用詔來茲

五臺山湧泉寺碑文

地湧璇源山驛著醒心之號天開金界禪宮標盥掌之  
名故鍊性高僧每棲真於碧澗而薰修淨侶多遯跡於  
丹泉用浣滌乎塵氛乃流傳夫靈蹟五臺山湧泉寺者  
祇陀化域震旦清都宿歷井參聳蓮花之五萼山連恒  
代環柏谷以千盤師利垂光神燈燭夜摩騰演教仙梵  
飄空陟中頂之岵堯指北巖而迤邐路入清涼之谷萬  
派跳珠俗稱澡浴之池一泓喚玉神膏澤沸金猊駐影

而徘徊細縠齋淪香象凌波而蹴蹋諸天撝護四衆皈  
依既撥蘚以披榛遂結亭而甃石雪竇寫空明之色月  
林生定慧之香朕以西巡駕臨初地喜清瀾之不竭念  
聖境之未湮爰發帑金式扶象教揭獅堂以纓壑紺碧  
重新翼鴈舍以連霄煙嵐增煥雖慈恩廣大千江共印  
圓暉而誠懔感通一勺亦沾法乳珠旛寶網無雲不現  
吉祥粥鼓齋鐘是水皆分功德縣靈長於億載甘露恒  
滋普福利於羣生祥河永濟泐諸貞石昭示來茲

五臺山廣宗寺碑文

蓋聞教闡浮提資神功於廣運理融淨域表大義於正  
宗山號清涼藏名歡喜覽勝則鴈門紫塞標奇則鹿苑  
珠林式承由舊之規宜示維新之象廣宗寺者幽棲妙  
境禪悅精藍泉飛猊座之旁塔湧鷲峯之半當其開基  
曩代鑿石成龕架宇虛巖範銅爲瓦大孚金像儼然分  
照十方小朶天城久矣齊稱五佛屬星霜之流易致風  
雨之漂搖朕法駕時巡祇園蒞止特頒金帛再飾寶坊



畫棟於以重輝雲楣因茲永煥風旛高卓偕鐵鳳以翔  
翔月鏡長圓並金羊而焜燿種福田於福地事重視  
釐宣梵唄於梵天意兼勸俗庶幾宏敷廣席徹權實之  
指歸丕振宗傳識源流之派別云爾

五臺山白雲寺碑文

三明闡教弘塵海之津梁八正開宗示靈山之門闕白  
雲寺者五臺之接待院也面臨達道已饒林麓之觀後  
枕巖椒即是煙霞之宅乍焚絲而出岫紺馬羣翔俄散

綺以盈川玉毫同色縈青繚白朝暮皆宜  
罨翠浮嵐陰晴互換松寮爽塏霏香靄於  
諸天蓮社蕭閒隔氛埃於下界聖真茲焉  
顯化開士託以潛棲溯厥由來亦云舊矣  
然而法輪未建祕境猶湮階繡苔錢難覓  
雀離之舍壁留蝸篆莫瞻螺髻之容惟洪構  
之有期信勝因之不昧朕旁蒐竺典結念名  
區特頒內府之金鏐用飾上方之象設天龍  
八部齊拱齋筵鐘板六時共修禪誦刹竿  
高峙風琴動而月鏡升梵宇長新意蕊飛而  
心燈炳冀

願船之普濟道在弘慈庶覺路之咸登義存廣善云爾

東嶽廟碑文

京師朝陽門外向有東嶽廟自元明迄今歷有年所康熙三十七年居民不戒而燬於火其明年朕發廣善庫金鳩工庀材命和碩裕親王董其事不勞一民不興一役經始於三十九年三月訖工於四十一年六月不三歲而落成殿閣廊廡視舊加飭焉夫五嶽爲名山之長而泰山尤羣嶽之宗於時爲春於德爲仁而其神之靈

又能膚寸成雲霖雨天下故諸嶽止祀於其方而泰山之祠徧宇內崇德報功所從來久矣朕即位以來殫心治理訪求民隱閱視河工屢經魯地皆命專官致祭凡以爲蒼生祈福祉也茲朝陽既都城之巽位而東嶽廟又適在其地則因其方位之宜以隆望秩之典亦禮之可以義起者然則斯廟之成也神既得所憑依而民亦遂其瞻仰自茲以往風雨以節寒暑以時俾海宇得休養生息以共樂於豐穰之世庶於朕四十餘年惠愛黎

元之意其稍有慰乎爰書重建之歲月以昭示來茲云  
爾康熙歲次甲申冬十一月上旬書

穹覽寺碑文

哈喇和屯者蒙古名色釋之即烏城也乃古興州之所  
轄因世久事殊前朝未及設官分職皇輿等書編察難  
考朕避暑出塞因土肥水甘泉清峯秀故駐蹕於此未  
嘗不飲食倍加精神爽健所以鳩工此地建離宮數十  
間茅茨土階不彩不畫但取其容坐避暑之計也日理

萬幾未嘗少輟與宮中無異萬幾偶暇即窮經史性理  
諸書臨池揮翰膳後即較射觀德以安不忘危之念此  
其大畧也因有離宮隨侍人員共祝萬壽而建寺不日  
即成又求扁額以垂永久朕賜書云穹覽取沈約驤首  
覽層穹之意在行宮之巽位寺勢雖微蓮社梵音鈴鐸  
經聲巨細皆備內有三大士相仙衣飄颻瑞園涵影以  
空寂爲本慈悲爲教汲引四生津梁三界清鐘夜聞遠  
近罔弗皈依月殿朗輝中外靡不瞻仰況右倚層巖左

帶大河口外諸藩來往進貢皆由經過三庚無暑六月

生風地脈宜穀氣清少病誠爲佳景前朝以戍邊不暇

何得駐蹕今四海爲一八表同風自京北至萬里如同

家人父子豈有他術哉以誠而已今臣下歸福於朕朕

曰天下皆福朕之福也先憂後樂朕之職也所願者年

豐歲稔煙塵永息余之念茲在茲之意足矣無以妄求

佛有所知自有保護康熙四十三年歲次甲申秋八月

中秋日

北鎮廟碑文

醫巫閭屹峙東北為幽州巨鎮昔虞帝封十有二山此其一也穹崇磅礴靈瑞所鍾實護王氣以壯鴻圖與嶽瀆諸神並垂祀典朕省方問俗嘗過其境望其佳氣鬱鬱蔥蔥上插霄漢下瞰蓬瀛懸瀑飛流喬松盤蔚知其所以保障而迎休者蓋有素矣向錫扁額式展褒崇而廟貌未隆無以昭顯特勅修造遣專官以恪乃事凡所需給皆頒自內府始於康熙四十五年七月訖於本年



十一月不四月而告厥成功焉規制宏備輪奐維新紺  
宇琳宮照耀山谷於時臣民瞻仰罔不欣悅而府尹臣  
奏請謂宜光文翰勒諸貞珉朕御極以來勤恤民隱祇  
奉

天庥敬共神明罔敢稍斁維北鎮之奕奕為神京之翊  
輔嘉符凝集靈爽式憑神其永贊雍熙益弘福祐錫蕃  
昌於庶類固丕祚於萬年用慰朕精虔之至意爰樹穹  
碑書重修歲月以示來茲康熙四十七年閏三月

隆興寺碑文

真定府城隆興寺者前臨滹水後睇恒山城郭逶迤林木縈帶敞高明之淨域標爽塏之琳宮考厥始基肇自隋代宋開寶時重加創造神光夜燭首出赤山之銅法雨晨流復下頰龍之木靈異既啓崇宇斯興遂洗香塗仍裝寶像稽諸紀載良有明徵自是以來七百餘載風雨摧剝日就傾圯朕曩從巡省所過爰命鳩工役不煩民貲出內府復以專官董領其事經始康熙四十二年

之夏落成四十八年之冬複殿重樓雲日輝映層巒列  
棟金碧參差開銑鍤之真容具莊嚴之實相七十三尺  
復還舊觀千萬億身長留勝跡洵十方所瞻仰為萬品  
所皈依茲寺也密邇神京接連畿輔地當都會時際豐  
穰煙火於焉殷繁輪蹄之所輻湊莫不齋心肅慮致禮  
加虔斯亦慈氏之宏規而法門之傑構矣夫旨窮六度  
首以仁義為宗諦演三乘多證善惡之果宣昭覺路導  
引迷津亦有裨於人心不無關於世教今茲重新梵宇

更續禪燈上為

慈闈祝釐下為兆民祈福營建之意實在於斯寺中榜額凡十有九皆朕親書複製碑文勒諸貞石俾垂無窮焉

重修西頂廣仁宮碑文

天地之大德曰生在四時為春在四德為仁易文言曰元者善之長也君子體仁足以長人自古帝王茂對育物四海之大萬民之衆以及昆蟲草木之微各遂其生

者無非體天地好生之德以流澤於無窮也易繫辭又  
言乾大生坤廣生則是生物之功天始之而地更廣之  
蓋坤者母道也母道主慈其於生物為尤近焉京城西  
直門外有西頂舊建碧霞元君宮地近西山之麓直今  
西苑之西南所謂萬泉莊者固郊畿一勝境也元君初  
號天妃宋宣和間始著靈異厥後禦災捍患奇蹟屢彰  
下迄元明代加封號成弘而後祠觀尤盛郭郭之間五  
頂環列西頂其一也歲時既久陳迹都荒碑碣猶存櫟

桷弗整其謂安神何歲在戊子發內帑命有司鳩工重  
葺之閱一載而落成棟宇穹然垣廡翼然殿寢秩然丹  
雘燦然瞻拜其下者虔肅有加焉朕於萬幾之暇亦往  
展禮仰祝

聖母之釐俯介生民之祉以祈純嘏以鞏皇圖顏其額  
曰廣仁宮羣臣請立石以紀之朕思仁之為道大矣擴  
之可放六合約之止在一心先儒論仁謂心如穀種其  
生之性即為仁故物物而有仁則生生而不已天地之


於人物父母之於子皆是道也朕君臨天下日以養育  
羣生為念俾穉者得以長壯者得以樂老者得以安期  
於生齒殷繁兵刑寢息民無夭札物無疵癘總以一仁  
推之而有餘今獨於茲廟曰廣仁者蓋以元君之為神  
有母道焉母道莫大於坤今之廟宮適位坤維元君其  
佐坤之厚德以廣其仁使首善之區同臻壽域寰寓之  
內永託慈庥斯神貺與日星共著而裡祀與金石常新  
矣







聖祖仁皇帝御製文第三集卷二十四



總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文三集卷二十

五至  
七

詳校官原任編修臣徐立綱

欽定四庫全書薈要

聖祖仁皇帝御製文第三集卷二十五目錄

碑文

重修菩薩頂碑文

和碩裕憲親王碑文

和碩恭親王常寧碑文

太子太傅都統三等公議政大臣吏部尚書中

和殿大學士佐領贈少保仍兼太子太傅謚



文襄圖海碑文

武英殿大學士兼吏部尚書佐領加二級謚文

清阿蘭泰碑文

文

訓飭士子文

頌

唯

天為大頌

并序

贊

上帝閣贊

為七十八歲老人光輪像贊



欽定四庫全書薈要卷一萬三千一百九

集部

聖祖仁皇帝御製文第三集卷二十五

碑文

重修菩薩頂碑文

蓋聞沙界三千標鴈門於五頂紺宮十二顯鷲嶺於一  
臺摩騰天眼之所憑阿育神光之攸燭水火金木行配  
土而居中南北東西嶽得嵩而成五諸方盡攝千聖咸  
登洵紫府之瑋觀名山之勝境矣茲菩薩頂寺者地多



靈跡閣本真容冥贊化機大布貞觀之詔宏資王度聿  
新景德之規覩金像於白毫啟寶筵於翠岫羣龍北向  
樓臺聳蒼靄之中雙練南飛鐘磬出煙蘿之外曩以文  
殊示化獨現全身因之歷代相沿尚虛傑構朕惟法輪  
常轉象教無邊宜開廣大之宗特發恢弘之願基因闢  
而加敞殿以配而彌尊河浮香象普賢分般若之光陸  
湧青蓮大士結跏趺之座旃檀婆律有佛皆拈薝蔔優  
曇無花不笑彼此百千賢劫獨歸不二法門萬億人天

共證前三妙諦豈獨金繩珠網萃中拂於一堂白足赤髭走盍囊於千里已哉爰勒豐碑永昭慧日

和碩裕憲親王碑文

國家景運厯洪本支百世用惇秩叙懋建屏藩矧茲同氣之最親加以懿行之茂著恩無間於終始禮務盡夫榮哀紀述生平倍增愾歎惟王為

皇考世祖章皇帝之長子朕之親兄也胄既屬尊齒復居長而秉性寬和持身謙牧虛受之量雖疎賤不遺矜

慎之衷雖細微必飭而其大者則在因心展孝曲盡

慈寧色養之誠視國如家克敦夙夜奉公之義入而預  
聞大政出而翊贊戎機佐致昇平共享清晏豈期偶恙  
遽遘鞠凶當王之初疾也嘗遣醫審藥躬視再三王自  
謂漸瘳諄辭遜謝及朕時巡塞上哀訃忽聞遂觸冒炎  
蒸倍道遄返輟朝臨奠製誄抒懷歷喪禮之告竣常涕  
泗之橫集顧瞻華屋杳隔春暉歲月不淹頓成陳迹能  
不悲夫迄今追惟往事溯自髫齡或同侍寢門或偕游

禁苑或參稽圖史或陪扈鑾輿朕日篤家人昆弟之歡  
而王則益修臣職惟謹四十餘年曾無失德天懷樂善  
何日忘之經曰高而不危所以長守貴也滿而不溢所  
以長守富也王服習斯訓美備厥躬按法旌行予謚曰  
憲洵無忝矣茲王之寢園在黃華山麓川迴巖抱既固  
且完朕親加相度迺襄大事嗣子保泰命紹舊封式纘  
王緒於戲惟王克忠克孝之節允樹為臣為子之型王  
之休德朕褒揚之王之後嗣朕佑苾之爰据實摛文勒

之貞石用垂令聞於不朽俾後之覽者知所景仰焉

和碩恭親王常寧碑文

國家因親錫寵固莫重於宗支而自近推恩尤必先乎  
同氣故手足之誼既篤生前軫恤之仁復加歿後凡以  
道隆敦本禮備飾終典至渥也惟王朕之介弟幼授親  
藩久沐尊崇歷霑賜賚方期奉天倫之樂承日接之歡  
克保修齡茂膺多祉何圖春秋猶壯齒髮未衰疾忽  
侵溘焉凋謝緬惟曩昔感悼良深特遣官以築幽宮復

勒銘以垂貞碣嗚呼音容漸邈嗟朱邱之長辭歲月旋  
移悵黃鑪之永閔式頒寵命昭示來茲不其休歟

太子太傅都統三等公議政大臣吏部尚書中和  
殿大學士佐領贈少保仍兼太子太傅謚文襄  
圖海碑文

朕撫御方夏勤求治理維茲承弼之臣協心毗贊綏靖  
邦家實倚賴焉爾圖海秉資忠愍砥行端勤密勿周旋  
歷有年所敬以事上誠以持躬淵鑒沈幾克膺大任自

為都統時嘗平荆楚西山之亂還入綸扉贊襄匪懈迺  
逆賊吳三桂憑藉寵靈煽動南服一時羣不逞之徒囂  
然附和察哈爾孤負國恩造釁構孽爾以將軍副信郡  
王祇承廟算出關征討膚功立奏東服底平繼以涇原  
騷動西土震驚命爾為大將軍以乘勝之師迴戈西嚮  
賊方肆其狂蹶思與滇逆併力惟爾以重臣建牙遂得  
橫截秦隴扼亢擣虛逆勢窮蹙始帖耳垂尾復來效命  
邇年以來爾鎮撫三秦威畧大著能使羣賊膽寒則凡

天戈所指建者定之成功者惟爾勞勩為多爵以上公  
俾之振旅方將復煩以機務與之講持盈保泰之理共  
享隆平至治詎圖勤瘁之餘溘焉殞逝腹心失倚深用  
盡傷雖恩卹有加錫之嘉謚而朕軫悼元老之心則未  
有已也爰命伐石樹之墓道使後有溯勲舊之烈者得  
以考焉康熙二十二年五月初二日

武英殿大學士兼吏部尚書佐領加二級謚文清

阿蘭泰碑文



朕惟國家之務全賴平章簡我良臣得之匪易其有克  
副股肱之寄積抒夙夜之勤律已彌見小心佐政能持  
大體方切倚毗而不假年飾終之禮有加哀往之情恒  
篤用泐貞石永世有辭爾武英殿大學士兼吏部尚書  
佐領加二級謚文清阿蘭泰有容之德大受之材自歷  
百司御事以至為冢卿罔不慎乃在位朕甚嘉之用俾  
爾弼余一人以襄大政爾能和衷以協力推誠以布公  
導國家蕩平正直之塗養人心清靜寧壹之福十年之

久一眚無聞豈惟朕心所素知抑亦羣情所悅服至於  
潔廉之操尤著美於朝端蕭然故居朕嘗書額示寵且  
性本謙沖義惟止足每一求退朕輒黯然欲斷來章溫  
言批荅間有微疾賜問頻仍豈期近者臥病旬遂爾  
不起輟朝深痛未解朕懷贈馬賻金卹爾身後臨喪祖  
奠如朕親行加祭易名悉從優異嗚呼緬生平不事聲  
名之迹惟密勿常多贊助之勞朕無溢辭務傳其實尚  
俾知我弼臣之遺徽茂烈足以光於邦家風於有位千

秋不泯眎此豐碑康熙四十年四月初十日

文

訓飭士子文

國家建立學校原以興行教化作育人才典至渥也朕臨馭以來隆重師儒加意庠序近復慎簡學使釐剔弊端務期風教修明賢材蔚起庶幾棧樸作人之意乃比來士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓

言再加警飭爾諸生其敬聽之從來學者先立品行次  
及文學學術事功源委有叙爾諸生幼聞庭訓長列宮  
牆朝夕誦讀寧無講究必也躬修實踐砥礪廉隅敦孝  
順以事親秉忠貞以立志窮經考義勿雜荒誕之談取  
友親師悉化憍盈之氣文章歸於醇雅毋事浮華軌度  
式於規繩最妨蕩軼子衿佻儻自昔所譏苟行止有虧  
雖讀書何益若夫宅心弗淑行已多愆或蜚語流言脅  
制官長或隱糧包訟出入公門或唆撥姦猾欺孤凌弱

或招呼朋類結社要盟乃如之人名教不容鄉黨弗齒  
縱倖逃褫扑濫竊章縫返之於衷能無愧乎況乎鄉會  
科名乃掄才大典關係尤鉅士子果有真才實學何患  
困不逢年顧乃標榜虛名暗通聲氣夤緣詭遇罔顧身  
家又或改竄鄉貫希圖進取囂凌騰沸網利營私種種  
弊情深可痛恨且夫士子出身之始尤貴以正若茲厥  
初拜獻便已作姦犯科則異時敗檢踰閑何所不至又  
安望其秉公持正為國家宣猷樹績膺後先疏附之選

哉朕用嘉惠爾等故不禁反復惓惓茲訓言頒到爾等  
務共體朕心恪遵明訓一切痛加改省爭自濯磨積行  
勤學以圖上進國家三年登造束帛弓旌不特爾身有  
榮即爾祖父亦增光寵矣逢時得志寧俟他求哉若仍  
視為具文玩愒弗儆毀方躍冶暴棄自甘則是爾等冥  
頑無知終不能率教也既負栽培復干咎戾王章具在  
朕亦不能為爾等寬矣自茲以往內而國學外而直省  
鄉校凡學臣師長皆有司鐸之責者並宜傳集諸生多

方董勸以副朕懷否則職業弗修咎亦難逭勿謂朕言之不預也爾多士尚敬聽之哉康熙四十一年正月

頌

唯

天為大頌

并序

康熙乙酉正月六日初辛有事於

南郊是夜瑞雪清塵光風拂面瞻拜之際不覺虔密精誠筋力彊健所以不揣無文敬賦唯

天為大頌一篇聊記其事云爾

唯

天溥覆唯大涵弘無微不照億兆攸同至誠感

神豈曰高崇玉帛鐘鼓禮云表衷為民請命祈穀神功  
潛施默化密運罔窮惟予小子潔虔齊戒對越

昊蒼匪敢少懈食乃民命時若是快念茲邦本無遠弗  
届履薄臨冰敬勤作誠宵旰縈縈夙夜何解東風拂淑  
庚日布雲玉花遍野萬姓欣欣占年自慶望澤先殷愆



多德寡恐塞上聞一日二日萬幾紛紜休戚相關乃寐  
夜分猗猗娛娛須臻風化熙熙皞皞所賴春夏惟德動  
天編氓趨下燠寒以時蕃廡禾稼三季苦辛至冬少暇  
穀黍登場子女敬迓

紫壇紺席殷薦成田欽若昭事四十四年求端可畏鑑  
之在天慎終如始寸陰幹旋作民父母正直無偏前後  
念茲庶幾保全

贊

上帝閣贊

唯天最高下臨則近美惡昭章其情難隱忠孝有報逆者媿忿大道三無丹經五蘊至哉敬誠守身慎謹維皇上帝降衷於民惇獨鰥寡懷保在心人之為善夙夜日新惻隱何自虛明覺真蒼蒼鑑此錫福臣鄰威鎮北地神武玄方羣魔電掣萬類宣揚雨暘時若壽世康祥

為七十八歲老人光輪像贊

法象為教報應之緣慈雲溥蔭甘露連綿四句一藏九

部大千鼻豎眉橫天真志堅覺性清靜咒鉢生蓮惟爾  
守戒特賜宸篇

聖祖仁皇帝御製文第三集卷二十五